



Corina Casanova surdat il presidi da la FMR a Jon Pult. Foto Hans Huonder

Il venderdi passà è il gremi «purtader» da la Fundaziun Medias Rumantschas (FMR) sa constitui da nov. Jon Pult (40) presidescha a partir da l'entschatta d'avrigl 2025 la fundaziun. El succeda a Corina Casanova (69) da Tarasp ch'ha presidià la FMR dapi l'onn 2019. Durant ses temp d'uffizi è l'antieriura chanceliera federala s'engaschada per installar e constituir la nova fundaziun sco instituziun indispensabla per las medias rumantschas scrittas. Il cussegl da fundaziun FMR engrazia perquai a Corina Casanova per sia gronda lavur e sia premura. Il nov president da la FMR, Jon Pult, è creschì si a Cuira e viva actualmain a Cuira ed a Berna. Cun Jon Pult surpiglia il presidi da la FMR ina persona rumantscha che sa mova dapi blers onns en il mund da la politica, da la comunicaziun e da las medias. Sper il presidi hai er anc dà il venderdi ina midada tar ils commembers dal gremi: Kevin Brunold (40) da Surcuolm è vegnì tschernì sco nov commember dal cussegl da fundaziun. Il directur da Surselva Turissem s'engascha era politicamain sco deputà en il Cussegl grond. Kevin Brunold succeda a Carl Hassler (71) da Glion. Il cussegl da fundaziun engrazia a Carl Hassler per sia valurusa lavur dapi l'onn 2019. El è s'engaschè famamain surtut cun sia experientscha en fatgs da persunal e da finanzas. Il cussegl da fundaziun da la FMR sa cumpona a partir d'avrigl 2025 suandantamain: Jon Pult (president), Rico Valär (vicepresident), Barbara Janom Steiner, Gion Capeder, Gian Ramming e Kevin Brunold. La FMR responsescha tranter auter era la part redacziunala da La Pagina da Surmeir. Er en num da la redacziun FMR in cordial engraziament a la presidenta Corina Casanova ed al commember Carl Hassler – ed in cordial bainvegni a Jon Pult e Kevin Brunold.

Per la redacziun FMR,
David Truttmann, schefredactor

Support per moziun Engler

Claudia Cadruvi/FMR

Angal darar on moziuns success – oter tgi schi Stefan Engler sa fatschainta cun igl louf. Sainza cuntervusch è igl Cunsegl digls cantuns benevento marde la sia moziun. Igl politicher surmiran pretenda tgi la Confederaziun paia 80 % per proteger muntaneras.

«Tgi tgi paia, cumonda, dei la Confederaziun adegna, sch'ella pretenda prestaziuns digls cantuns», è fatg attent Stefan Engler marde aint igl Cunsegl digls cantuns. Damai vala er igl cuntrari: Tgi tgi cumonda, duess paer. Las leschas federalas pretendan maseiras da proteger las muntaneras digl louf. L'antschatta favrer è la Confederaziun pero sbasso igls daners per las maseiras da protecciun sen 50 %, igl rest duessan paer igls cantuns. Cun la sia moziun pretenda Stefan Engler tgi la Confederaziun paia puspe scu avant 80 %. Igl Cunsegl digls cantuns è detg GEA alla moziun.

Sustign da Friedli e Stocker

«Betg angal igls tipics cantuns muntagnards èn pertutgias», è detg Esther Friedli dalla PPS: «Er aint igl cantun da Son Giagl sa dera-san igls loufs a moda surproporziunala.» L'emda passada seian treis loufs passos tras la vischianza vischinanta, noua tg'ella veiva, betg gliunsch davent dad unfants tgi spitgivan igl bus da scola. An vista a chella dera-saziun seia chegl sto sbaglea da sbassar quasi

sur notg las contribuziuns per proteger muntaneras. «Igl cantuns èn stos surstos e n'òn mianc pudia budgetar igls costs.» Perchegl è la politica da Son Giagl pledo per la moziun Engler.

Las scarpadas antras loufs seian sa sminueidas igl davos taimp, è detg Simon Stocker dalla PS. Igl louf scarpa dantant per gronda part animals da muntaneras sainza protecciun. Glez sotlingescha tgi talas maseiras seian necessarias, la cumpart finanziaria dalla Confederaziun duess s'augmentar puspe.

Rösti sa dosta e succomba

Igl minister d'ambiant Albert Rösti è suppligta da refusar la moziun. Cun igl pachet da spargn vegia igl Cunsegl federal redutgia igls ageids finanzials sen 50 %. Da chegl seia pertutgeida tranter oter la protecciun da muntaneras. «Ia sung pertschert tgi sa tracta d'en spustamaint da costs tar igls cantuns», è detg Albert Rösti. «Nous spitgagn tg'igls cantuns na redutgeschan betg la protecciun da muntaneras, mabagn contribueschan er ena tscherta somma.» Igl Cunsegl digls cantuns n'ò betg do suatientscha agl minister d'ambiant ed è accepto la moziun da Stefan Engler cun 38 cunter 0 vuschs ed 2 abstenziuns. Scu proxim tracta igl Cunsegl nazional la fatschenta. Igl n'è betg l'amprema gEDA tgi Stefan Engler è success cun en'intervenziun tgi pertotga igl louf: igl 2014 è el pretendia cun ena moziun da schlucclar la strantga protecciun digl louf. Las tgombras federalas on gia assignia la moziun.



Stefan Engler è success cun en'intervenziun tgi pertotga igl louf. Foto Keystone/Alessandro Della Valle